

## IN MEMORIAM



### **Prof. dr Šefik Mulabegović (1935-2022)**

U ponedjeljak, 10.10.2022. godine, u 10 časova, u Tuzli je preminuo prof. dr Šefik Mulabegović, jedan od osnivača Ekonomskog fakulteta u Brčkom i Univerziteta u Tuzli i dugogodišnji profesor Više ekonomsko-komercijalne škole i Ekonomskog fakulteta u Brčkom.

Prof. dr Šefik Mulabegović je rođen 22.10.1935. godine u Derventi. Od 1940. do 1992. godine živio je u Brčkom, a nakon toga, sve do smrti, u Tuzli. Nakon osnovne škole, u Brčkom je 1953. godine završio Srednju ekonomsku školu. Diplomirao je na Ekonomskom fakultetu u Zagrebu, 1959. godine.

Od oktobra 1964. godine zaposlen je na Višoj ekonomsko-komercijalnoj školi u Brčkom, kao predavač više škole za predmet Statistika. Magistrirao je na Ekonomskom fakultetu u Zagrebu 1967. godine, nakon čega je izabran u zvanje profesora više škole za predmet Statistika. U isto zvanje ponovo je biran 1971. i 1975. godine. Obavljao je dužnost direktora Škole u dva mandata.

Profesor Mulabegović je jedan od zaslužnih profesora za osnivanje Univerziteta u Tuzli i Ekonomskog fakulteta u Brčkom, 1976. godine. Nakon osnivanja Univerziteta u Tuzli biran je za predsjednika Savjeta i na funkciju prorektora Univerziteta.

Doktorsku disertaciju iz oblasti demografije odbranio je na Fakultetu političkih nauka u Sarajevu, 1982. godine. Iste godine izabran je u zvanje docenta, 1983. godine u zvanje vanrednog profesora, a 1987. godine u zvanje redovnog profesora Ekonomskog fakulteta u Brčkom, na predmetu Statistika.

Pored naučno-nastavnog rada, profesor Mulabegović bio je i veoma angažovan društveno-politički radnik. Bio je predsjednik Skupštine opštine Brčko, delegat u Republičkoj zajednici za naučni rad, te član Republičkog savjeta za unapređenje vaspitno-obrazovnog rada SR BiH.

Nakon odlaska u Tuzlu, 1992. godine, prof. Mulabegović je radio na osnivanju i pokretanju nastavnog procesa na Ekonomskom fakultetu u Tuzli. Godine 1994. ponovo je biran za prorektora Univerziteta u Tuzli i zaslužan je za pokretanje “Ljetnjeg univerziteta u Tuzli”, koji je postao tradicionalan. Bio je i vršilac dužnosti rektora Univerziteta u Tuzli. U nastavnom procesu na Ekonomskom fakultetu u Brčkom ponovo je angažovan krajem devedesetih godina prošlog vijeka.

Prof. dr Mulabegović je objavio veliki broj naučnih i stručnih radova iz oblasti statistike i demografije, kao i njihove primjene u ekonomskom planiranju i analizi, organizaciji i upravljanju poslovanjem preduzeća. Tokom svoje dugogodišnje karijere u nastavnom i naučno-istraživačkom radu, bio je pokretač, nosilac i učesnik mnogih razvojnih projekata koji su rađeni na ekonomskim fakultetima u Brčkom i Tuzli, kao i u saradnji sa Ekonomskim institutom u Tuzli. Kao rezultat takvog angažovanja, zaslužan je za izradu i objavljivanje mnoštva različitih naučnih i stručnih publikacija.

Profesor Mulabegović nas je zauvijek napustio. Iza njega su ostala njegova djeca, njegovi studenti, radne kolege i saradnici, njegovi prijatelji i oni koji su ga poznavali. Svi oni će reći da je bio dobar i brižan otac, ugledni građanin, veliki gospodin, dobar profesor i dobar čovjek.

Studenti će profesora Mulabegovića pamtiti po njegovoj ljudskosti i dobroti, po pristupačnosti i korektnom odnosu i želji da u svakom od njih podstiče i razvija sve ono što je plemenito i dobro. Kolege i saradnici koji su imali sreću da rade sa profesorom reći će da je on bio pouzdan i odgovoran radnik, dobar čovjek, koji je u svakome tražio i cijenio samo ono što je dobro. Od njega, kao rukovodioca na odgovornim funkcijama koje je obavljao, mogli su mnogo toga da nauče. Uz sve to, profesor je bio iznad svega veliki čovjek, jer su iza njega ostala velika djela.

Neka je vječna slava i hvala našem dragom profesoru Šefiku Mulabegoviću.